



Reykjavík, 18. september 2020

Efni: Frumvarp til laga – öflun sjávargróðurs í atvinnuskyni

Samtök fyrirtækja í sjávarútvegi (samtökin) hafa tekið til umsagnar frumvarp til laga um breytingu á lögum um stjórn fiskveiða (öflun sjávargróðurs í atvinnuskyni) sem auglýst voru á samráðsgátt stjórnvalda þann 4. september síðastliðinn. Um er að ræða frumvarp þar sem horft er til þess að bæta stjórn nýtingar á sjávargróðri hér við land. Í frumvarpinu er lagt til að regluverk verði einfaldað. Þá er afnumin heimilt til að leyfisbinda móttökustöðvar fyrir þang. Tekin verður upp skylda til setningar nýtingaráætlana fyrir þangfjörur. Að lokum er lagt til að reinarstjórn verði viðhaldið við öflun sjávargróðurs utan fjöru.

Samtökin telja að gott verk hafi þegar farið fram við einföldun laga og reglugerða að undanfögnu og mikilvægt að haldið sé áfram á sömu braut. Í flestum tilvikum er einföldun á regluverki og stjórnsýsluframkvæmd sem snýr að atvinnulífinu til mikilla bóta. Að því sögðu styðja samtökin meginmarkmið þessa frumvarps um einföldun regluverks en vilja þó koma eftirfarandi athugasemdum á framfæri.

Með frumvarpinu er lagt til að Fiskistofa haldi skrá um sjávarjarðir þar sem þangsláttur er stundaður. Þá verði óheimilt að slá þang fyrir landareign nema fyrir liggi nýtingaráætlun eiganda skips skv. 15. gr. a. um slátt fyrir landinu, til hið minnsta fjögurra ára. Þá er mælt fyrir um að nýtingaráætlun skuli hafa að geyma lýsingu á því hvernig ætlan er að tryggja að sláttur á þangi verði sjálfbær. Að mati samtakanna er einkar mikilvægt að í nýtingaráætlun sé fullt tillit tekið til mikilvægis sjávargróðurs sem nauðsynlegs skjóls fyrir uppeldi ungvíðis nytjafiska og annarra tegunda. Þang og þari mynda mikilvægt búsvæði fyrir ungvíði nytjafiska, þar á meðal þorsks, grásleppu og fleiri tegunda. Þari getur náð allt að 20 ára aldri og elsta þang allt að 100 ára aldri. Að þessu sögðu verður að vera ljóst að varúðarleið og varfærnisleg nálgun sé viðhöfð við mat á viðeigandi nýtingaráætlun og fullt tillit tekið til mikilvægis búsvæða ungfisks; því væri réttast að Fiskistofu væri skylt að leita umsagnar Hafrannsóknarstofnunar um þann þátt málsins áður en nýtingaráætlun er staðfest eða ógilt.

Að lokum lýsa samtökin sig reiðubúin til að eiga samtal við fulltrúa ráðuneytisins til að gera nánari grein fyrir sjónarmiðum samtakanna. Samtökin áskilja sér jafnframt rétt til að koma að frekari athugasemdum á síðari stigum.

Virðingarfyllt
f.h. Samtaka fyrirtækja í sjávarútvegi

Heiðmar Guðmundsson

